



Selasa, 03 Januari 2023
Ogen: Pengerana 3:11



Kerincuhun Meteh Wari Si Pagi



Ibas kalak Karo nai lit ikataken 'ngogge retak tan' siniakap maka kerina kecibal geluh manusia enggo isuratken i bas tanna. Enda nuriken kuga manusia merincuh meteh kerna geluhna, ngangkai dengen meteh kerna wari si pe pagi. Kuga nge masa depanna. Sabap labo sada pe ia meteh kerna wari si pe pagi, subuk dirina jine bage pe kalak siikelengina. E maka isuruhna kalak si iakapna ngangkai kerna si e.

Kerina si jadi i bas doni enda, labo sada pe metehsa seakaten Dibata singaturkenca. Kegeluhen doni enda erpaksa-paksa. Bage me si ituriken sinuratken kitab pengerana enda. Kerina lit paksana, e maka perlu kal manusia ersikap katawari pe i bas ndalani kegeluhen si bage rupana. Iakuken penulis maka Dibata merekenca kerinana i bas paksa si payo. Amin bage 'rasa ingin tahu' manusia mbelin kal e maka tuhu labo pernah puas manusia i bas kerina kecibal kegeluhenna. Keirncuhen meteh kerina si jadi arus iraduken ras kengasupen erpengendes nandangi perbahanen Dibata si mbelin e.

Rainer Maria Rilke, nuratken kata motivasi nina *'Dan sekarang kita menyambut tahun baru. Penuh dengan hal-hal yang belum pernah terjadi'*. E maka man kalak sierkiniteken kecibal si bagenda arus ialaken alu dem pengarapen. I bas si langa pernah jadi dengen si la si eteh kuga si e maka arus sipebelin pengarapennta maka kerina mehuli jadina.

Enggo sibengketi tahun 2023, enggo kita ringan i bas wari peteluken tahun enda, la sitik kari kejadi-kejadi sijumpai kita. Banci saja kita sengget, merawa, mbiar ntah aru ate. Tapi inget la sitik keriahen ukur, malem ate si ijumpai kita i bas mentasi tahun 2023 enda. Erpengendes man Tuhan i bas erbage sijumpai kita.